






Biblioteka  
Ojców Kamedulów  
w Błeniszewie





S E P T E M  
P S A L M I

CONFSSIONALES.

A quodam Lusitaniæ  
Principe,

C O M P O S I T I;

Atque verè pœnitentibus

Ad dulcem contriti cordis  
occupationem,

Post repetitas alibi editiones,

*Iterum, ad piorum vota  
& desideria,*

In lucem publicam

P R O P O S I T I.

Ex Typographia Clari Montis Cze-  
stochoviensis. Anno Dñi 1694.

B. f. Bien. B. V. 30


\*\*\*\*\*

CONFITEBOR TIBI DOMINE,  
IN TOTO CORDE MELO.

*Psal: 110.*

\*\*\*\*\*

*M. Fried. Cant. in Schule Vignani*



P S A L M I  
CONFESSIONALES.

PSALMUS I.

**Q**uis dabit capiti meo aquā  
& oculis meis fontem la-  
chrymarum.

Ut mœrore congruo animæ  
meæ damna deplorare suffici-  
am: adest quippe manifesta &  
maxima causa mæstitiæ cum  
antiquos dies cogito: juve-  
niles Annos considero mentis  
intuitu.

In hac meditatione defecit  
spiritus meus, scio enim qualis  
fuerim, immo qualis fuisse non  
deberem.

Cognosco qualis sum, timeo  
qualis futurus sim.

Et eò magis timeo, quò mi-  
nus doleo.

Utinam magis dolerem, u  
minus timerem.

Sed Domine quia jam diu  
percutis & nondum doleo, jam  
diu vocas & adhuc non audio.

Jam diu pulsas & cordis mei  
pessulum non aperio, circum-  
dant me dolores mortis.

Et cum multis replear dolo-  
ribus exterius, nullum prorsus  
qui ad salutem operetur dolo-  
rem sentio interius.

Nec solos senectutis dolores  
experior, sed vir dolorum ego  
sum à juventute mea.

Cunctique dies mei labori-  
bus & ærumnis pleni sunt.

Et tamen doleo, quia sem-  
per dolens dolere nescio.

O! stupendam & ineffabilem  
Cœlestis Medici Sapientiam!

& im-



n, u & immensam summi Regis bonitatem.

diu O singulare omnium bonorum largitoris beneficium.

dio Das enim mihi dolores ne  
mei peream jucunditatibus, & ut  
im- discā sine offensione jucundari.

lo- Das dolores temporales ne  
fus patiar æternos, affligis corpus,  
lo- ut salves animam.

ores Flagellas ut sanes, occidis  
ego ut vivifies.

ori- Sed pro dolor: medicinam  
m- ex occulta manu misericordiæ  
em tuæ invitus suscipio.

m- Et antidotū salubrium dolorum  
em quibus misericorditer  
m! in me se vis, rudis non agnosco.

A- Et quomodo agnosco, si instanter à te peto, ut à me auferas dolores, qui tamen sinè do-

loribus salvari non possum.

Quomodo enim nisi per dolores sanabitur, qui per delectationes infirmatur.

Fac ergo Domine ut doleam, & doce me salutare dolorem.

Quo tristitia mea vertatur in gaudium, & exultem in salutare tuo dicens.

Gloria Patri, & Filio, & Spiritui Sancto. Sicut erat in principio, & nunc, & semper, & in secula seculorum, Amen.

PSALMUS II.

**F**luunt dies & labuntur anni, sed infelix ego homo, qui post tot animæ meæ labes, post casus gravissimos ac diuturnos nondum resipisco.

Nec compungor de peccatis  
meis,

meis, in ea frequenter relabi  
contemno, ab eis resurgere non  
curo, nova veteribus & maiora  
minoribus accumulans.

Quid faciã Domine aut quò  
ibo, cum novissimum tempus  
meum, venerit? ubi abscon-  
dar à vultu iræ tuæ, aut quo  
à facie tuâ fugiam?

Cum vocaveris me ad ju-  
dicium, & requisieris à me de  
talento mihi tradito rationem,  
quid respondeo tibi, aut quo-  
modo negligentiam meam ex-  
cusabo.

Cum sederis super Thronum  
Maiestatis tuæ & usque ad ul-  
timum quadrantem præceperis  
mihi reddere rationem villi-  
cationis meæ.

Dicam equidem Dñe vim

patior responde pro me, quis enim ego sum ut respondeam tibi in iudicio.

Sed quid si me ipsum respondere compellas? confusus, ter-  
ritus, ac tremens dicam.

Nihil Domine perlucratus  
sum quinimò nequiter & ina-  
niter consumpsi talentum tu-  
um ac bona tua vivendo,  
luxuriosè dissipavi.

Stulte quidem locutus sum  
dicens vivendo, rectius enim  
moriendo dixissem, sed vivere  
me tunc putabam & mortuus  
eram.

Quia sine te vera vita mea  
vivebam: & si aliquando te-  
cum vixi, vix memini.

Quin imò si vita impij, mors  
potius quàm vita dicenda est,  
meri-



merito dicam quod prius cē-  
pi mori quā vivere.

Nondum enim quid vitā es-  
set perfectē intellexeram, cum  
jam te vitam vitarum, ac fon-  
tem vitæ dereliqueram, & in  
multis sceleribus ætatem ma-  
litia supplevit.

Ex utero matris meæ egres-  
sus non fueram, & jam pecca-  
tor eram, in mundum ingre-  
diens, peccata in quibus genu-  
erunt me Parentes mei adhuc  
peccati nescius deflevi.

Nec penitus cessaveram ali-  
ena flere peccata: quando pro-  
pria commisi, quæ cognovi &  
non fleui,

Infans iniquitates colui &  
pueritiam in quā purus esse  
debui, impurus egi; exhala-

A 5 bant.

bantque de limosa concupiscē-  
tia carnis & scatebra puberta-  
tis & obnubilabant cor meum.

Ut non discerneret lucem à  
tenebris & serenitatem mentis  
à caligine libidinis, & ætatem  
imbecillem obliviosam ac la-  
scivam rapiebat voluptas per-  
fida ac dolosa per abrupta cu-  
piditatis, & ebulliebam per  
scortationes meas, in inferis sa-  
tiari desiderans.

A pueritia veni in adolescē-  
tiam nec factus sum citius ado-  
lescens quò citius mea pravi-  
tas adolevit, & sylvescere  
ausus sum varijs & umbro-  
sis amoribus, à quibus abstra-  
ctus & illectus flagitiorum gur-  
gite mergebar in interitum &  
perditionem.

**Dies**

Dies adolescentiæ meæ malæ & nefandæ transferant, & pergebam in iuventutem sed ad priores revertabar, quanto ætate maior, tanto vanitate turpior, juvenis fui & attigi virum, & viguit in me vitium semper pro virtute.

Senui & incanui nec ambulavi in vijs tuis: sed velut puer centum annorum puerilia adhuc senex facio.

Ubi ego aliquādo innocens fui ut secundum tempus innocentiae meæ à te velim judicari, etiamsi illud constituas mihi ad iudicium? justus es enim Domine & rectum iudicium tuum, reddisquæ unicuique secundum opera sua.

Ego autem omnia mea ve-

A 6 reor,

reor, quoniam opera tenebrarum sunt & operarius iniquitatis fui ab initio.

Atque impiorum semitas libens semper sequutus sum, jaci in vitijs, sicut porcus in immunditijs, & sicut ille filiquis pascitur, sic ego fabulosis & scurilibus verbis oblectabar.

Serijs autem & utilibus contristabar: cum operantibus iniquitatem communicabam & cum electis eorum convivebam & gloriabar in malitia, qui potens eram in iniquitate.

Excusare me amabam, accusare nesciebam & ingravabam cor meum: eoque peccatum meum insanabilius, quò me peccatorem non esse arbitrabar.

Nec



Nec solum medicinam animæ meæ ad mortem infirmanti non querebam, sed oblatam recusabam, & adversus eam mihi ministrantes animo irreverenti & infrunito indignabar.

Arguentes me persequabar, loquentes verò mihi placentia amplexabar, & in illorum sermonibus mihi complacui, qui non habebant cor rectum ad te, studui in commentis ac mendacijs.

Et in cunctis dilexi magis tenebras quàm lucem: ecce vitam meâ annūciavi tibi Deus meus, hæc est series vitæ meæ, in quâ iram tuam merui, hæc respondebo tibi cum interrogaveris me de me.

Sed

Sed tu delicta iuventutis mee  
& ignorantias meas ne memi-  
neris Domine, nec intres in ju-  
dicium cum servo tuo, quia  
non justificabitur in conspectu  
tuo omnis vivens.

Si intrare tamen velis, quo-  
niam DEUS diligens iudicium  
tu es fac mecum iudicium, sed  
non fac iustitiam & iudica me  
secundum iudicium diligen-  
tium nomen tuum, ut cantem  
tibi misericordiam & iudicium.

Memento Domine quod li-  
cet nequam ego sum, servus  
tamen tuus sum, & filius an-  
cillæ tuæ.

Et non ad multitudinem mi-  
seriarum mearum, sed ad ma-  
gnitudinem miserationis tuæ  
aspicias, ut cum propter sce-  
lera

lera mea iratus fueris in me,  
misericordiæ tuæ recorderis.

Ut non in æternum irasca-  
ris mihi sed miserearis tribu-  
lato seruo tuo ut te laudet a-  
nima mea, & confiteatur mi-  
serationes tuas.

Gloria Patri, & Filio, & Spī-  
ritui Sancto. Sicut erat in  
principio, & nunc & semper,  
& in sæcula sæculorum, Amen.

## PSALMUS III.

**H**Ei mihi misero: quia ira-  
tum adversum me, con-  
stitui Redemptorem meum &  
legem eius contumaciter ne-  
glexi.

Iter rectum spōte deserui &  
sicut ovis renuens Pastorem su-  
um per loca arida & inaquosa  
salon.

sa longè lateq; circūactus sum.

Errās in inuio & non in via,  
aspera quęque & inaccessa pe-  
netravi, & ubique tribulatio &  
angustiæ, in via iniquitatis &  
perditionis lassatus sum.

Et ambulavi vias difficiles  
quęrens requiem & non inve-  
niens.

Quia non te Domine quere-  
bam sed in terrā sterili & in re-  
gione mortis ubi nulla requi-  
es, sed labor continuus & af-  
flictio spiritus inhabitat: ibam.

Cum in honore esse non in-  
tellexi, sed quasi unus ex gregi-  
bus brutorū, inter lustra ferarū  
fuit incolatus meus.

In anxietatibus cum volu-  
ptatibus moratus sum, & in  
sentibus cubile meum stravi,  
& ob-



& obdormivi in interitu, & speravi requiem in tormentis.

Nunc ergo quid agam? quomae in tantis periculis vertam? spes adolescentiæ meæ corruerunt omnes.

Et factus sum naufrago similissimus qui mercibus amissis nudus enatat.

Jaçtatus vento, pelago elongatus à Portu, & vitam salutis non apprehendo, sed rapior sinistrorsum.

Retia mihi disposuit hostis, quocunq̃ue ibam, & pedibus meis laqueos tetendit.

Ego autem despexi, & incessi securus inter lubrica, & in peccatis meis mihi blanditus sum.

Credidi juventutem mortis lege

lege non teneri, & hâc fiducia  
deceptus abij post turpia car-  
nis meæ desideria.

Et ultra modum sensualitati  
habenas relaxavi, sequens eam  
quocunq; me ferebat impetus.

Et dixi insipiens in corde  
meo, quid ante medium de  
extremis cogitas.

- Longa tibi restat dies; con-  
verti poteris cum volueris.

- Sic inveteravi in peccatis,  
& consuetudo pessima. versa  
est in naturam: jamque velut  
peccati mancipium catenatus  
illi servio.

Et quasi phreneticus odienſ  
carnem suam dum sibi ipsi ma-  
nus inferre laborat delibera-  
tionis ratione sopitâ.

Sic ego gravius ac pericu-  
losius

Iosius odivi animam meam,  
si quidem nefarias & violentas  
manus sibi ipsi iniecit impe-  
nitentia cordis mei.

Et peccandi obstinata vo-  
luntas infelicem animam me-  
am proprijs manibus lacera-  
vit & exulceravit.

Atque ita gehennæ cumulos  
mercatus in dies magis secun-  
dum duritiem meam & impœ-  
nitens cor meum thesaurizo  
mihi iram in diem iræ.

Vestum jugum à me excute-  
re aliquando tentavi, sed non  
valeo, quia inheret ossibus.

O si tandem excidat à col-  
lo meo ut te diligam vel sero;  
excidet quidē si tu jufferis Do-  
mine, & auxilium mihi mise-  
ris ex alto.

Non

Non merui fateor , sed tu largitor optime, qui solem tuum æqualiter oriri facis super bonos & malos.

Et indignis etiam non poscentibus, bona temporalia cōcedis, quomodo spiritualia peccantibus denegabis.

Miserere ergo mei DEUS & imple petitionem pauperis, qui Dives es in misericordia, ac soles in hilaritate misereri.

Et purgas volūtatē à consuetudine mala & exaudis gemitus compeditorum.

Et solvis à vinculis quæ nobis facimus si non erigamus adversum te cornua falsæ libertatis.

Operi manuum tuarū porrige dextēram ut non cum cecidero collidar. Et



Et collisus detrahar in profundū lacū in quo non est aqua.

Libera me de ore Leonis truculenti ad prædam parati, & animæ meæ inhiantis ut devoret.

Protektor enim meus & liberator meus tu solus es, & in sola misericordiâ tuâ tota spes mea est.

Fiat igitur misericordia tua super me quemadmodum speravi in te.

Speravi & non confundar, sed voti mei compos cantabo tibi.

Gloria Patri, & Filio, & Spiritui Sācto. Sicut erat in principio & nunc & semper, & in sæcula sæculorum, Amen.

## PSALMUS, IV.

**N**OCTES meæ in merore  
transierunt, & terroribus  
me agitant innumeris, consci-  
entia concutit insomnem & ve-  
lut gladio ancipiti, ab ea vul-  
neratus torqueor.

Somnus meus varijs illusi-  
onibus turbatur, non mihi qui-  
etem afferens, sed laborem;  
in cogitationibus meis perno-  
cto & cum defessus conor da-  
re palpebris meis dormitatio-  
nem, illico somnus recedit  
ab oculis meis & in doloribus  
dormio semper à diurnis curis,  
in quietâ lassitudine excitatus,  
& effervent omnia interiora  
mea absque requie.

Abominabilis factus est animæ  
meæ cibus ante desiderabilis,

potus

potus meus cum fletu misce-  
tur, & confusio ante oculos  
meos est ruborq̃ue in genis  
meis cum recordor quam gra-  
viter te offenderim DEUS me-  
us & quam varijs modis, vi-  
ribus meis ac donis tuis abu-  
sus sum.

Dies meos in vanitatibꝫ pro-  
degi, consumpserunt me curæ  
immortales, & insensatis co-  
gitationibus huc & illuc di-  
stractus, irreparabilẽ feci tem-  
poris jacturam, somnia mihi  
multoties fingebam & gaude-  
bam.

Evanuiq̃ue delusus in vani-  
tatibus & deliramentis meis,  
ascendebam usq̃ue ad cęlos &  
confestim descendebam usq̃ue  
ad abyssos: & dum abyssus a-  
byssum

byssum invocat, contabuit in malis anima mea.

Et computrui coram oculis hominum, optabam impossibilia, & phantasticâ illorum fruitione, similis factus sum dormientibus, qui è somno surgentes nihil invenerūt in manibus suis.

Vilis ego sum vermiculus, & tamen nunquam me Domine cognovi, sed erecto supercilio me solum super omnes exaltavi, temereque jactavi verba mea & in jactantia sapientiam esse existimavi.

Infestus fui socijs meis, & multis sæpe iratus, absque causa contumelias irrogavi, abhortui patientiam & dilexi iram.

Nec

In Nec causa suberat, & irasce-  
bar servis atque familiaribus  
meis imo & mihi met indigna-  
tus maledixi.

Et amicis meis cum ludi-  
brio exprobravi, aduersitates  
meas invitus tuli, & magis in  
homine quam in Dño confidi.

Impatiens veritatem audi-  
vi, & in furore sapientibus re-  
spondi, aspiravi libenter ad  
iniurias & vindictas & ultio-  
nem Deo nunquam reservavi.

Adversus tuentē suam cau-  
sam exasperabar: nec respon-  
sio mollis, aut vir levis cōpla-  
cebat. In litibus & contenti-  
onibus recreabar, & inimi-  
citas ac discordias malevolus  
sæpe inter fratres seminavi.

Salubria & recta Consilia

B

auribus



auribus percepi, sed disciplinam non apprehendi, Confiliarios prurientibus auribus placido aspiciebam vultu, libero vero animo loquentes mihi, longe faciebam à me.

Egentibus manum non extendi, & cum esurientibus panem meum non comedi, in plateis jacebant leprosi & mendici, ego autem transibam avertens oculos ab eis ne commoverentur viscera mea, & misericordiâ commotus elemosynam darem eis.

Debitum mihi mutuantibus non solvi, & ut inordinato appetitui parerem ære alieno me gravavi, ad illicita patranda dives esse concupivi, ad officia verò pia semper me pauperem ostendi.

Et

Et quod pietati defuit, concupiscentiæ meæ affluentè abundavit, in commestationibus, & convivijis ultra modum letatus sum, & naturam paucis contentam insatiabili voracitate vitiavi.

Venter meus fuit quasi DEUS meus & gloria mea in pudendis eorum, qui terrena sapiunt accuratiores & suaviores cibos exquisivi, & obtentu necessitatis obumbravi sæpe negotium voluptatis.

Cum adulteris portionem meam posui, & cum mæchis familiaris conversatio mea fuit: in sanguinibus immoderate versatus sum, & iumentis insipientibus cõparatus, adeo me in hoc vitio prostravi, ut

pudeat dicere, quæ non pudeat fecisse.

Vanitati aures & lingua mea serviebat, dum per illam impinguabat caput meum oleum peccatoris, & per hanc sæpe supplevi, quod in laudibus meis alij minus fecisse videbatur & cum opportune poteram tradere alijs laudes meas, & meo & alieno ore semper gestiebam prædicari.

In omni deniq; genere deliciarum sæculi, à delicijs domus tuæ longe lateque exulavi.

Et si quando metus mortis ac futuri judicii socordiã meam excitabat, & me à profundissimo voluptatis gurgite ad horam revocabat, subito tan-

quam

quam canis ad vomitum re-  
vertebar.

In ijs mortuus adhuc vivo,  
& in morte manens, ad mor-  
tem festino, eamque cum fe-  
stinatione quoque venientem  
ad me video.

Sed cito anticipent me mi-  
sericordiæ tuæ Domine, pri-  
usquam veniat dies illa terri-  
bilis calamitatis & miseræ di-  
es magna & amara valde.

Ut tamen moriar, & vivam  
& enarrem miserationes tuas  
super omnia opera tuâ.

Reipice Domine, & vide  
quomodo anima mea jacet in  
concupiscentijs suis paralytica  
& ab eis male vexatur.

Erue eam de visco tenaci  
mortis ut tibi soli, qui solus

vita es, inherereat, & relictis omnibus sequatur te qui es super omnia. Dic animæ meæ Domine DEUS salutis meæ, salus tua ego sum, fiat tibi sicut vis.

Fac audire me hanc vocem tuam vocem exultationis & salutis, ut curram post eam, & apprehendam te, apprehensumque teneam nec dimittam donec me sanum dimiseris.

Ad quem enim præter te infirmus ibo, ut curet me? aut quis poterit sanare infirmitatem meam, nisi qui propter homines & propter humanam salutem descendit de cælis, ut sanarentur à languoribus suis.

Quis vivificare poterit nisi  
qui



qui mortificat & vivificat omnia? quis salvare poterit nisi tu DEUS meus & Salvator meus in tempore tribulationis? salva ergo & vivifica me, qui vita & salus æterna es omnium in te confidentium.

Tibi autem initij experti sine fine gloria, tibi laus, & honor, tibi jugis adoratio, tibi gratiarum actio fons perennis misericordiarum.

Procul enim à te recesseram & elongavi fugiens: & tamen ægro fugienti, dum te vocat, præsto ades, priusque ei salutem tribuis quam gemitum audias.

Sufficit enim velle sanari, ut sanes velle vivere, & vitam præstes, & in benedictione

dulcedinis tuæ prævenis desiderium peccatoris seipsum cognoscentis.

Dicam ergo tibi Domine & sufficiet mihi, iniquitatem meam ego cognosco, & quid est cognosco, nisi sanari volo? & unde cognosco quoniam conturbata sunt omnia ossa mea, & anima mea turbata est valde à peccatis meis.

Ecce jam iniquitates meas pono in conspectu tuo DEUS meus, ut cures & sanes animam meam, quia peccavi tibi.

Sicut enim non volens DEUS iniquitatem tu es, ita non vis mortem peccatoris, sed magis ut convertatur & vivat.

Non enim mortui laudabunt te Domine, sed nos, qui vivimus

vivimus benedicimus Domi-  
no, & confitemur ei, quoniam  
bonus, quoniam in sæculum  
misericordia eius.

Gloria Patri, & Filio, & Spi-  
ritui Sancto. Sicut erat in-  
principio & nunc & semper,  
& in sæcula sæculorum, Amen.

## P S A L M U S V.

**M**iserias meas tibi Domi-  
ne revelavi, non ut tibi  
notas faciam vias meas.

Qui omnes ab initio præ-  
vidisti & omnes gressus meos  
dinumerasti: nosti enim ab-  
scondita tenebrarum, & ocu-  
lis tuis nuda & aperta sunt o-  
mnia.

Ipseque non modo cernis,  
sed & discernis cogitationum

B5 late-

latebras & medullas affectionum.

Sed detego ut tegas, ac protegas, revelo ut abscondas humiliatumq; & contritum spiritum in me agnoscas? & per huius oblationem Sacrificij & tibi omnium gravissimi propitius mihi sis ac parcas peccatis meis.

Multa dixi & quidem gravia, sed pauca hactenus commemoravi.

In pluribus enim pungit me vermis conscientiae meae, utinam rodatur putredinem.

Ut rodendo consumatur & ipse pariter consumatur, nec foveri incipiat in immortalitate: sed mordeatur ut moriatur, & paulatim desinat mordere mordendo. Sed

Sed heu mihi, quia cum finem me fecisse puto, in annuntiandis malis meis, tunc cogor quasi denuo incipere.

Et memoria mea plena spurcitiarum: abundatius alias atque alias recolit fordes.

Peccavi enim super numerum arenæ maris.

Etsi mihi centum sint linguæ oraque centum, vix è mille millibus unum referam.

Id tamen dolorem meum auget quod omnes transactas scditates meas & carnales corruptiones animæ meæ reminisci non possum.

Dum enim nova committo crimina, veterum obliviscor, sed quæ recordor non filebo.

Non quo amplius ea ama-

B. 6. re ve.



re velim, sed ut te validissimè amem, DEUS meus.

Et ut recolēti vias meas nequissimas in amaritudine cogitationis meæ dulcescas mihi dulcedo non fallax, dulcedo amabilis, dulcedo felix, & securus.

Amica itaque mihi fuit invidia & charitas inimica.

Regibus & Principibus atq; Ecclesiæ ministris detraxi, & momordi eos mēdaci susurro.

Justorum laudes & merita denigravi & impiorum facta approbavi.

Si quando de probis hominibus sermo erat, obijciebam falsas maculas & occultos eorum defectus propalabam.

At in levissimis quasi de gravi-

graviori crimine, apud alios accusabam.

Si vero contra pravos infamia laborabat, repente exiles virtutes eorum concionabar.

Et meritis dignioribus eos anteferebam, sicq; maioris eis ruinæ causa fui.

Si videbam furem, currebam cum eo & cum nequitiam meam consumarem adversus filium Matris meæ ponebam scandalum.

Et à calumnia & fraudibus consanguineis meis non parcebam.

Optavi proximo meo infelicitatem & ærumnas, & in solâ morte illius spem meam collocavi.

Innocentium causam non defendi

defendi & nocentibus quasi  
de eorū cruciatibus, gaudens  
improperavi.

Multos temerè culpæ reos  
esse judicavi & in oculo fra-  
tris mei modicā festucam vi-  
dens, in proprijs oculis ma-  
gnam atque crassam trabem  
non sensi.

Acediam tanquam Matrem  
meam colui; fuit otium mi-  
hi Frater.

Et fugi omne honestum ex-  
ercitium ac laborem, torpe-  
bam per dies & de quotidia-  
nis in me locatis beneficijs,  
grates DEO meo non redde-  
bam.

Quam raro vero per noctes  
in lege tuā & in mirabilibus  
tuis, meditatus sum tu scis Do-  
mine,

mine, in somnis sæpe totam noctem duxi.

Et cum mens mea huc atq[ue] illuc ab uno te vagaretur in multa, nullibi occurristi ei.

Sine te ad lectum accessi, sine te in lecto cubui, sine te à lecto surrexi: sine te illuxit dies; sine te tota nox pertransijt.

Et ideo sine te semper fui, quia mecum semper fui, qui longe absum à te in tenebroso affectu meo.

Si forte tamen veniebas mihi aliquando in mentem & mirabilia tua opera considerare incipiebam.

Subito sarcina sæculi (velut somno assolet) dulciter premebar.

Et

Et cogitationes quibus meditabar in te, similes erant conatibus expergisci volentium, qui tamen superati soporis altitudine demerguntur.

De rebus conscientię meę sæpè ordinare proposui, sed delulit me semper dies pręsens sub expectatione futuri.

Supra fragile ac fallibile fundamentum innixus sum, & baculo arundineo atque infracto incubui: & dum in eo cōfusus putavi me firmiter stare, cecidi in ignē, & agnovi cadens, quā debiliter stetissem.

Inhiavi siti inextinguibili honoribus ac lucris, & in his cupiditatibus sevissimas passus sum difficultates.

Quilibet incōpositus & indisci-



disciplinato mihi amicus erat,  
& venam amicitiae coinquinabam  
sordibus concupiscentiae, candoremque eius obscurabam.

Tartarea libidine rapiebant  
me spectacula theatra, plena  
imaginibus miseriarum mearum  
& fomitibus ignis mei.

Nec solum aditum morti non  
observavi, sed etiam fenestras  
ei aperui.

Fueruntque singula membra  
mea fenestrae singulae quibus  
mors ad animam meam  
intravit.

Et sic subeuntibus novis,  
veteres sordes minime expurgavi  
quin potius multa horum  
in me germinaverunt peccata.

Propter quæ à facie tuâ e-  
iectus sum, DEUS meus & à  
tuâ præsentia cōsolatione de-  
stitutus quasi in desperationē  
corruo ignorans quo vadam.

Sed quò à te recedens ibo?  
aut quis in faciem meam aspi-  
ciet si tuam averteris à me,  
& velut reprobatum tuo me  
privaveris conspectu.

Odiosus procul dubio ero  
omnibus hominibus & tanquā  
vagus ac profugus interra.

In opprobrium & derisionē  
eo eis dum quæsierint à me ubi  
est DEUS tuus & quare repulit  
te à se.

Quid igitur faciam miser,  
cum me à protectione tuâ ali-  
enum, & in medio inimicorū  
meorum, adversum me forti-  
ter

ter pugnantium à te derelictū  
intuebor.

Faciem tuam Domine requiram, & vultum tuum gemebundus deprecabor.

Ne derelinquas me, & ne declines in ira à servo tuo.

Me etenim tanquam fugitivum sequuntur omnes inimici mei ut comprehendant & occidant.

Et ideo ad te quem fugi, confugere me oportet: Deus meus fortitudo mea, refugium meum & virtus mea in die tribulationis.

Sicut enim non est Deus absque te ita absque te non est Salvator.

Tu ergo Domine, qui omnes misérias meas nosti, &  
à quo

à quo figmentum fragilitatis  
meæ non est absconditum pro-  
ijce post tergum tuum omnia  
peccata mea.

Et iniquitatum mearum an-  
tiquarum ne memineris, sed  
salvum me fac secundum mi-  
sericordiam tuam ab omnibus  
persequētibus me, & libera me.

Quoniam non est qui redi-  
mat, neque qui salvum faciat,  
nisi tu Domine, qui salvos fa-  
cis omnes sperantes in te.

Et libera pauperem à po-  
tente & de manu fortiorum  
eius.

Ne abscondas ergo Domi-  
ne à me faciem tuam, ne de-  
spicias me Deus salutaris me-  
us, firmamentum meum & li-  
berator meus.

Quo-

Quoniam pauper & inops  
ego sum nimis: oculi autem  
tui in pauperem respiciunt.

Et si iustitia tua me quæsi-  
erit absconde me in sinu be-  
nignitatis tuæ.

Quâ me ferens longanimi-  
ter ad pœnitentiam invitasti,  
longanimis enim es, patiens,  
& multum misericors atque  
præstabilis super malitia.

Quin imo nihil tibi magis  
proprium quam misereri sem-  
per & parcere.

Et ideo omnium misereris,  
quia omnia potes, & dissimu-  
las peccata hominum propter  
pœnitentiam.

Parcis autem omnibus, quo-  
niam tua sunt Domine, qui a-  
mas animas.

Con-

Convertere ergo ad me cō-  
versum ad te, eripe afflictam  
animam meam de omni an-  
gustiâ.

Ut repleatur os meum lau-  
de, & dicat tibi Benedictus  
Dominus, qui non permisit me  
dari in captionem dentibus  
adversariorum meorum.

Nisi quia Dominus mihi ad-  
iutor fuisset forte vivum deg-  
lutissent me: Anima mea sicut  
passer erepta est de laqueo  
venantium,

Laqueus contritus est & ego  
liberatus sum.

Gloria Patri, & Filio, & Spi-  
ritui Sancto. Sicut erat in  
principio, & nunc & semper  
& in sæcula sæculorum, Amen.



## PSALMUS VI.

**M**E miserum quid agam,  
quia singularis fera de-  
pasta est animam meam & fa-  
ctus sum in prædam inimici.

Omnibus me spoliavit bo-  
nis quibus tu me Domine or-  
nasti, & coram te timeo nu-  
dus apparere.

Dives ac decorus à facie  
tua egressus sum, & abij va-  
gus post sordes in via corru-  
pta & in pravitate cordis mei  
& denigrata est anima mea su-  
per carbones, & immutatus co-  
lor eius optimus.

Et qui croceis nutriebar  
amplexatus sum stercora: a-  
deoq; vilibus peccatorum ve-  
stibus indutus, me metipsum e-  
xinanivi ac deformavi. Se-  
cundum

cundum similitudinem prævaricationis Adæ.

Ut in imagine in quâ tu Domine creasti me, tibi jam cognitus non sim, & quasi scabiosam ovem inter oves pascuæ tuæ me commorari non permittes.

Quomodo ergo ad præsentiam immensæ Maiestatis tuæ, in cuius conspectu cæli non sunt mundi, vacuus, immundus, ac vilis, audebo redire, & delinquendo infatuatus communicare cum electis tuis.

Rediissem utique licet pavidus ac pudefactus, paternam tamen tua benignitate fretus, dulcis enim Pater es filio proficiscenti in longinquam Regionem.

Sed

Sed ex diuturna peregrinatione redeunti multò dulcior, attamen redeundi ad te DEUS facultate careo.

A sevjssimo enim prædone vinctus teneor non ferro alieno, sed ferreâ meâ voluntate, ex quâ catenam mihi constrinxit inimicus, & in operibus, atque in omni vitioso famulatu ad amaritudinem perducit animam meam.

Refugium meum longè est à me, quia longe à peccatoribus salus, & in misera servitute mori cōpellor; nisi tu Dñe de cælo prospiciēs opem feras.

In limoso profundi luto infixus sum & tempestas temptationum quasi fluctus sevi maris obruit atque demersit me,

C      ita ut

ita ut imminencia pericula  
posse me evadere desperē nisi  
assumpseris me DEUS meus.

Quo enim surgere magis  
nitor, eo gravius allidor, in-  
tus & foris mihi ipsi sum mo-  
lestus & utrobiq̃ue hostes do-  
mesticos invenio, qui me pes-  
fundant.

Ad dexteram & ad sinistrā  
circumspicio, & neminem cui  
me tuto credam video, sed un-  
diquāq̃ue metus concutit & ad  
quemcunq̃; diverto amicum  
fidelem non reperio.

Et quomodo reperiam, qui  
DEO meo datam fidem non  
servo? consolantem me que-  
sivi in afflictionibus & cala-  
mitatibus meis, & non fuit  
qui me consolaretur ex omni-  
bus charis meis. Sed

Sed incidi in homines verbosos & loquaces nimis, quin potius mutos; & ob hoc mutos, quoniam non ex eis sonabat verbum tuū DEUS meus.

Sed delictum oris eorum sermo labiorum ipsorum: qui defectus meos sine compassione damnabant, & insultantes mihi durè & invec tivè adversum me jurgia provocabant.

Stultis deceptoribus sæpè suffragatus sum, & à recto tramite declinans, in eorum sententiam ignarusivi; sensimq; atque paulatim ab eis perductus sum ad eas nugas & insanias: ut quamvis à verà Religione (te opitulante) nunquam defecerim, crederem multas nœnias.

Ceterum inexcusabilis homo ego sum; quia cum te DEUM in veritate semper cognoverim, non in veritate & spiritu adoravi.

Sed commutavi veritatem in mendacium, & servivi creaturæ potius quam Creatori, & in rebus corruptibilibus me, atque ceteras voluptates meas exquisivi.

Sed age Domine dulcedo mea & fiducia mea & quemadmodum fecisti, ut in verâ fide te agnoscerem excita me in peccatis dormientem, & illumina oculos meos ne unquam obdormiam.

Illumina accende, & erige eos ad te, ut in lumine tuo videant te lumen æternum,  
lumen



lumen indeficiens & inextinguibile, lumen dulce & delectabile.

Videant & lætentur, atq; concupiscant decorem tuum, sciantq; nihil præter te vel in te, & propter te esse diligendū.

Tu Domine qui lux vera es, illuminans omnem hominem venientem in hunc mundum, fac oriri hoc lumen tuum in tenebris meis & desiderare me justificationes tuas.

Ut vi amoris liquefacta anima mea deficiat in salutare tuum, atque sitiatur delectationes tuas.

Animam meam dico, sed liceat mihi tuā dicere, tua enim est, quia tu eam creasti ac dedisti, mea vero est, quia ego à te recepi.

C3

Cu-

Custodi ergo creaturam ,  
quam ad tuam imaginem singulariter formasti, & ne permittas perire pretiosum donum tuum, quo me super omne opus manuum tuarum sublimasti.

In corpore meo & in membris meis, exige quidquid velis: induatur caro mea putredine, & consumatur verminibus: sed queso Domine, tantum parce animæ meæ & in eam non extendas manum tuam.

Reduc me in vias tuas, ante solis occasum (advesperascit enim) & coge me ire ad te, si vocare parum est.

Coge ut libet, modo vadā,  
& non peream non propter  
me,

me, quia tuâ misericordiâ toties abutens eâ me indignum feci.

Sed propter nomen Sanctû tuum aufer à me cor lapideum, & da mihi cor carneum: ac pone Spiritum tuum in medio mei, ut ambulem in præceptis tuis, & iudicia tua custodiam.

Sero nimis advenio Domine fateor utinam venissem citius, sed scio & certus sum quod venientibus tempus non præscribis, modo veniant.

Nec minus benigne recipis novissimos quamvis enim odio peccatum habeas, peccatorem tamen non odisti nec in perditione eius lætaris.

Et ideo etsi longam morâ fecerit tu tamen patienter expectas eum. C 4 O quâ

O quam dulcis, ô quam suavis vox illa tua Domine, in in quâ animæ meæ spem dedisti: fornicata es cum amatoribus multis, tu tamen revertere ad me, & ego suscipiam te.

Quam delectabile ac jucundum verbum illud, quo peccatores de se ipsis diffidentes consolaris: si impius egerit poenitentiam de omnibus peccatis suis, vita vivet & non morietur non enim voluntatis meæ est mors impij.

Magna quidem jucunditate audio cum te dicentem audio, quod exultantis Pastoris humeris reportetur ovis quæ erraverat.

Et drachma referatur in thesau-

thesauros tuos, collētantibus  
vicinis mulieri quæ invenit,  
& lachrymas excutit gaudium  
solemnitatis Domus tuæ, cum  
legerem in ea de minore filio,  
quoniam mortuus erat & re-  
vixit.

Da ergo Domine animæ  
meæ vocem virtutis tuæ, nec  
virtutis tantum torporem ex-  
cutientis animarum, sed & ra-  
dium lucis, annuntiantem pa-  
riter hominibus peccata eorū,  
illuminantem abscondita te-  
nebrarum.

Sonet vox tua in auribus  
cordis mei & dic animæ meæ  
dormienti quid tam diu lethar-  
gico gravaris somno, & vin-  
culis captiva detineris? hora  
est iam de somno surgere & ut

C. 5. . . . . dere.

derelinquas viam tuam atque  
revertaris ad me, qui redemi te

Revertere Sionamitis, re-  
vertere ut intueamur te, rever-  
tere & non tardes amplius ve-  
nire ad me; ego enim sum Do-  
minus Deus tuus qui voco te.

Ego sum ipse qui doleo ini-  
quitates tuas propter me, nec  
habeo in memoria priora.

Tunc fiducialiter dicā ego  
convertere anima mea in re-  
quiem tuam, quia Dñus benefe-  
cit tibi.

Ad eum secure vade, & licet  
à vijs tuis pessimis lassata; eo-  
citius perge, quo citius re-  
quiescere concupiscis.

Noli deterreri peccatis tuis,  
si enim fuerint ut coccinum  
quasi nix dealbabuntur, & sicut  
nebu-



nebula delebuntur, nec de audacia accusari verearis ubi de obedientia laudaris.

Vade & propera anima mea ad eum qui non venit vocare justos, sed peccatores, & si peccatrix es, DEUS peccatorum, DEUS tuus est.

Quid ergo ire times, quæ non à severo iudice vocaris, sed à Patre misericordiarum, ut misericordiam consequaris.

Ideo vade nunc lubens ad misericordiam, vocata, ne postea ad iudicium compulsa vadas.

In te jam Domine & Pater inclyte cōfido & non erubescā confiteri tibi deformitates & blasphemias meas, qui non erubui profiteri eas, coram ho-

minibus & latrare adversū te.

Murmuret Phariseus & dicat, quis potest dimittere peccata, nisi DEUS? mihi etenim qui ad cor loquitur DEUS est.

Cuius sermo vivus & efficax qui me vocat, pius ac tranquillius est, & qui non solet continere in ira sua misericordias suas.

In verbo itaque tuo securus ibo ad te DEUS meus fiducia mea, & portio mea in terrā viventium.

Ibo procidens ante te & Majestatem tuam non timebo quoniam tu vocas me, & ne offendam oculos tuos dum imundus appareo in conspectu tuo.

Sordes meas abluam lacrymis

mis assiduus, & palpebra à fletu non quiescet, sed erit lectus meus cōscius doloris mei.

Quo tibi placeo, dum mihi displiceo, & per te ad te conversus, de commissis pēniteo, ut mundo corde laudem te dicens.

Dōmine quis similis tibi, tūc enim speciosa erit laus in ore peccatoris & qui seminavit in lachrymis, in exultatione metet.

Gloria Patri, & Filio, & Spiritui Sancto. Sicut erat in principio & nunc & semper, & in secula seculorum, Amen.

PSALMUS VII.

**M**iserere mei DEUS quoniam tribulor & inenarrabilibus urgeor miserijs. Tor-

Torrentes enim iniquitatis conturbant me & intraverūt aquæ usque ad animam meam.

Ita ut quasi fluvius inundās peccata mea quæ hætenus dissimulavi, confiteri quoque & emendare neglexi eousque excreverint.

Ut supergressæ sint caput meum & à sensuali appetitu concupiscentiam, mentem, & voluntatem meam inflexerint, immo servituti Diaboli me subiecerint.

Vē mihi, quia totus lethalliter plagatus sum, & à planta pedis usque ad verticem nulla est in me sanitas.

Supplantavit enim me inimicus meus, & tanquam crudelissimus tyrānus in me sēviens,

is  
it  
n.  
as  
f.  
&  
x-  
ut  
5-  
o-  
n  
o-  
i-  
a-  
n  
i-  
r-  
i-  
Cum  
ens, omnibus me sensibus pri-  
vavit, relinquens solum intel-  
lectum.

Ut de damno & jactura mea  
addendo scientiam adderet e-  
tiam & dolorem.

Parum quidem noceret si o-  
mnimoda functione sensuum  
orbaret, & in cunctis actioni-  
bus meis prorsus insensibilem  
me fecisset.

Sed orbavit ad bonum &  
vim intulit ad malum.

Et stupore quodam insensi-  
bilitatis internæ animum me-  
um per exteriora effusum sic  
effecit ut damna interiora non  
sentirem.

Cum enim audire expedie-  
bat surdus eram & à veritate  
auditum avertebam.

Cum

Cum vero aures obturare æquum erat, ne audirent inutilia, & ineptias multorum, velox tunc ad audiendum ac benevolus auditor semper eram.

Celestia tanquam insipida gustabam; & ab omni spirituali cibo nauseabat anima mea.

Terrena vero super mel & favum dulciora judicabam.

Ad contemplanda quæ DEUS sunt, cæcus & animalis homo eram.

Quæ vero mundi sunt superbo oculo videbam & insatiabili corde cupiebam.

Nec in sensibus tantum sed & in membris meis quæ dedit mihi DEUS in ministerium animæ meæ viam salutis mihi occlusit antiquus hostis. Et

Et tales in hac dira obsidione mihi paravit insidias ut eas vitare nunquam potuerim, sed quoties fugam tentavi incidi in manus eius.

Peccavi enim videns, & videre nolens, obsurdescens & audire volens, tacens & loquens.

Stans & sedens; dormiens, & vigilans, ambulans, & quiescens.

Omnem denique proprium & communem usum sensuum & membrorum in turpem abusum immutavi.

Exardescens immundis desiderijs meis adeo ut omnem legem naturalem, Divinam, & humanam transgressus sim.

Et in sola peccati lege observan-



servanda diligens fuerim.

Utinam fuisset & jam non  
essem, sed heu! quoniã idem  
qui antea fui, adhuc sum, ni-  
hilque mutatus ab illo deterio-  
ra sequor.

Adhuc enim præsiciens vo-  
luntas languida dominatur: &  
anima mea fœdissima. horrēdis  
ulceribus undique scaturiens.

Non aliunde quam à seipsa  
in pristinis malis perseverat.

Sæpe mihi irascor, quia tē-  
det me vivere, cum non tē-  
deat peccare.

Cognosco stultitiam meam  
& confundor, ac confusus me  
reprehendo.

O carnalis amator cur in  
luto concupiscentiarum tuarū  
tam diu jaces.

Quid

Quid tantâ sollicitudine de rebus mortalibus satagis & peritura bona tam vehementi affectu cupis?

Aut quâ ratione bona dicis, quæ cum nimio labore & magno animæ tuæ detrimento acquiris.

Acquisita cum timore possides, possessa cum dolore amittis.

Cur anima mea propriæ conditionis & nobilitatis tuæ oblivisceris & sub putredine corporeorum sensuum miserâ & contumeliosam servitutem gerere non erubescis?

Cur infida mundi promissione deciperis, nec advertis quod illius summum donum vapor est ad modicū parens & vanitas vanitatū.      Eru-

Erubescce, erubescce peccator  
miserrime, quoties ad fallaces  
creaturas conversus à Creato-  
re tuo recessisti.

Et rediens ad temetipsum  
vide qualicunq̃ue oculo men-  
tis tuæ, quam crudeliter mi-  
seræ venationis obtentu ani-  
ma tua evisceravit semetipsam.

Dum vilem muscarum præ-  
dam immoderato captans de-  
siderio, araneorum instar ex  
proprijs visceribus sibi retia  
intexuit.

Erubescce iterum atq; ite-  
rum dico in quibus nullum fru-  
ctum habuisti.

Et amissum tempus plora ut  
fructum afferat tibi erubescen-  
tia: præbe cor tuum DEO, &  
solves quod debes.

In his

In his sermonibus exacerbor  
in me, dum interius admoni-  
tus, intro in interiora mea.

Conferens in corde meo,  
quid amiserim & quid inve-  
nerim.

At non quod probo bonum,  
sed quod volo malum hoc agō?

Velle enim meum tenet ini-  
micus & configuratum prio-  
ribus ignoratiæ meæ desiderijs  
captivat me, in lege peccati.

Sed tu Domine DEUS vir-  
tutum turris fortitudinis meæ,  
& Dominator vitæ meæ, au-  
xilium tuum ne elongaveris  
à me.

Ad defensionem meam con-  
spice, & protege me sub um-  
bra alarum tuarum ne corru-  
am in conspectu adversariorū  
meorum.

Et

Et de me gaudens inimicus meus ne dicat prevaluī adversus eum.

Dirumpe vincula improperij mei sub quibus incurvatus sum, & funes peccatorum meorum quibus fortiter constrictus sum solve potētissime Dñs.

Et notam fac inimicis potentiam tuam ut immolem tibi hostiam jubilationis dicens.

Quis loquetur potentias Domini? aut quis enarrabit omnes laudes eius? qui eripuit animam meam de morte & pedes meos à lapsu.

Qui salvavit me ex ore Leonis, & à cornibus unicornium humilitatem meam.

Ad quē clamabo nisi ad te?  
ad quem clamaverunt omnes  
patres

patres nostri & salvi facti sunt.

Ad te inquam qui non frustraris sperantes in te.

Pone itaq; me Domine juxta te, & cuiusvis manus pugnet contra me.

Nulla enim timebo mala, quoniam tu mecum es.

Ante omne desiderium meum, dele & detrahe quod planè alienum est à te.

Innova crea & confirma quodcunq; dederis in te.

Ut abiectis carnalibus & inutilib9 desiderijs, laudetur peccator in desiderio animæ suæ.

Et te solà verâ jucunditate frui desiderans intret postulatio mea in conspectu tuo ut in confidentia dicam tibi.

Desiderium animæ meę tribue

bue ei, DEUS meus, scio namq;  
& certus sum quod nemo poterit desiderare te nisi per te.

Nec ire ad te nisi tu traxeris eum.

Trahe ergo Domine & da mihi incipere in bono desiderio ut illud perficiam in bono opere.

Antequam novum propositum mos vetustus opprimat.

Et prior voluntas vetustate roborata novam superet.

Ut cum recta placet non revertar ad solita.

Indue me pretiosis vestimentis salutis decoris tui, & denuda me vilibus viduitatis meae indumentis.

Quibus deorbatus secundum pristinam conversationem

vete-




veteris hominis incedo, & noli  
opprobrij viduitatis meæ re-  
cordari amplius.

Ut ih te noviter indutus at-  
que novus homo factus, novo  
spiritu in novitate vitæ servi-  
am tibi.

Et in fragrantia unguento-  
rum tuorum ad te currens gau-  
deam in JESU Salvatore meo.

Gloria Patri, & Filio, &  
Spiritui Sancto. Sicut erat  
in principio, & nunc & sem-  
per, & in sæcula sæculo-  
rum AMEN.



D

ACTUS

A C T U S  
C O N T R I T I O N I S.

*Post quemvis lapsum in peccatum, & alias sæpe, præsertim verò ante Confessionem & in mortis periculo utiliter usurpandus.*

**O** Amabilissime Domine JESU Chrifte, Amor meus pro me crucifixe, amo te super omnia toto corde, ob infinitam bonitatem omnesque Divinas perfectiones tuas; & si possem omnium Angelorum & Sanctorum tuorum amore te amarem; nam omni possibili amore es dignissimus.

Et quia sic te amo, pœnitet me, & toto mentis affectu doleo,

leo, quod ego vilissima creatura tua, contra te optimum DEUM meum, cui omne peccatum vehementissimè displicet, unquam peccaverim. O si te non offendissem! O non egissem id quod sanctissimæ tuæ Voluntati & amori sic contrarium est!

Revoco, retracto, detestor, annullo & quantū possum annihilō quicquid feci cogitatione, verbo, opere, & omissione contra te, cupioq; ac desidero totā animā meā me id non fecisse.

Heu poenitet me iterum atque iterum, & millies, poenitebitque tota vitā meā. Et quamvis nulla poena aut infernus esset, nullum cœlum;

D 2                      tua

tua tamen amabilissima bonitas, à me, heu mihi! offensa sufficit, ut mihi cor dolore dirumpatur, & oculi flumina ac maria lachrymarū profundāt.

Propono firmissimè cum gratia tua sanctissimæ tuæ legi imposterum in omnibus obedire; peccatum quodvis super omne aliud malum vitare; integre confiteri; poenitentiam iniunctam explere; proximo meo, si quid teneor & debeo, satisfacere; offendendi te occasiones, quantum possum, fugere.

Con dono omnibus omnes injurias & offensas mihi factas, sicut meas à te mihi peto condonari. Offero tibi vitam & actiones meas bonas, cum gratia tua

tia tua à me faciendas, & omnes afflictiones, ( quas justè pro peccatis meis mereor ) à me sustinendas, in aliquam compensationem tot offensarum & injuriarum à me tibi illatarum.

Insuper offero tibi intensissimos compunctionis, contritionis, & detestationis affectus, quos unquam verè poenitentes & sua vel aliena peccata deflentes elicuerunt, & deinceps elicient; quos omnes, si ego solus possem, & si tibi placeret eos mihi dare, & alios omnes possibiles, elicere desidero: Offero inquam hæc omnia in unione perfectissimarum lachrymarum tuarum, quibus, ô amantissime Jesu,

nostra delicta deflevisti; laborum item & cruciatuum, quibus eadem expiasti; & omnium meritorum tuorum, per quæ spero veniam peccatorum meorum, & uberem gratiam à misericordissimis visceribus tuis, ut me emendem, & piam ac bonam vitam institutam, Amen.

*Alia Fraxis Actûs Contritionis  
desumpta ex Exercitijs R. P.  
GASPARIS DRUZHICKI.*

**D**EUS, Domine DEUS, dignissime DEUS, amabilissime, beneficentissime: ipsaque essentialis Bonitas, & Amor, & Sanctitas, & Sapiëntia, & Omnipotentia, & plenitudo Perfectionis

tionis DEUS. Justus meus,  
Judex meus, Pater meus, DEUS  
meus & odians, & vindicans,  
& condonans peccata, sanansq;  
contritiones nostras.

Reminiscor, recognosco, &  
confiteor coram Te, omnes, &  
singulas iniquitates meas: qui-  
bus unquam displicui tibi: &  
Voluntati, Sanctitati, Digni-  
tati, Bonitati, Charitati tuæ.

Displicent mihi, Domine:  
displicent, & super superque  
displicent, singula, & omnia  
peccata mea: quia ex se ma-  
la, & perversa: quia tibi di-  
splicita, & à te prohibita, quia  
irâ & vindictâ tuâ digna: quia  
supremæ Tuæ Maiestati, ama-  
bilissimæ Bonitati, honoran-  
dissimæ Sapientix, Potentiæ,  
Justi-



Justitiæ, ac Voluntati injurio-  
sa: quia innumera.

O utinam! utinam ea nun-  
quam, nunquam, nunquam cō-  
missem! Non corde, non ore,  
non opere, non omissione, non  
ullâ prorsûs iniquitatis ra-  
tione!

Totis viribus cordis, & mē-  
tis, & Animæ, & universæ sub-  
stantiæ meæ, totius quoque  
Universi: nec non omnibus  
atomis eius, etiam universali-  
satis, ac mihi adunitis: doleo,  
doleo, superdoleo, de omni-  
bus & singulis peccatis meis.

Odio perfectô, quo D E U S  
illa odit, odi & ego: odisse-  
que volo, & constituo in æ-  
ternum.

Abominor, detestor, exe-  
cror illa ex animo. Eru-

Erubesco, & confundor de illis: & coram quidem omni Creaturâ: sed maximè coram offenso à me, Te tam Bono DEO: tam digno DEO: tam Amabili DEO.

Tædet me illorum: &, heu quando eliberabor ab eis!

Fastidio, & nauseo illa, tanquam canem mortuum, & putidum.

Horreo illa, & contremisco totus ad memoriam illorum.

Eiuro, & abiuro illa: & recedo ab eis in æternum.

Onnem meum, & affectum & propensionem, & inclinationem, qualiscunq̃ue Voluntatis, & assuetudinis meæ, ita ab eis avertō, & avello, ut cupiam, statuamq̃ue, & quâ possum

possum faciam ; quasi impossibile mihi esse reverti, sive etiam inclinari, ad illa, & ad quęvis alia.

Desidero illa, & emendare, & emundare ; & jam nunc emundo, in Balneo sanguinis, & Meritorum Christi.

Cupio, propono, & decerno firmiter, expiare illa quàm plenissime, quoad culpam, & quoad penam omnem, & specialiter quoad spiritualem, & damni.

Propono, & statuo illa Sacramentaliter confiteri.

Propono etiam, & statuo constanter, plenam eorum fugam, vigilantemque deviationem.

Deniq; spero, & peto omnium,


um, atque singulorum, plenā,  
perfectamque, à te misericor-  
dissimo, atque indulgentissimo  
DEO meo condonationem.


Propter bonitatem tuam,  
propter JESU Christi Domini  
mei mortem, propter Pretio-  
sissimæ DEI Matris, omnium-  
que Electorum tuorum inter-  
cessionem ac merita.


Ad purum, summum, ple-  
num Divini Cordis tui gu-  
stum. Amen.

F I N I S.











Biblioteka Jagiellońska



stdr0024902



Journal  
Confession